




RIPOTI TOTONU: O AI TUPUIVAO O LOO FAATATAU I AI LE MOLIMAU A KALAMA?



TALA A'OGA O LOU LOTOIFALE:



AVEA OE MA A'U PA'AGA: Le agaga lea o le maliega na sainia i le va o a'oga lua, Aukilani ma le Iunivesite Aoao a Samoa. O le ulua'i taimi lea ua faamau ai sea faiga pa'aga a Samoa ma se tasi o iunivesite matua i le Pasefika. E faafetaia le sao a tamafanau ua mautulaga i Aukilani i le faataunuuga o lea matati'a. E faapena foi i isi iunivesite na mua mai. I le ata Pule Sili e to'alua: Pol. Dawn Freshwater ma Tuifuisa'a Pol. Patila Amosa.

Sauni le Tusi Faatonu'upu Samoa e tautua mo le gagana

O le afiafi na loma ma le aso na atofa, se'i silamio i le tusi sa tapena, mo se faamoemoe taua. O lea na taunuu lava i le afiafi o le Aso Faraile, 5 o Iulai, i le laumua o A'oga i Malifa.

Igoa o le tusi, Tusi Faatonu'upu o le Gagana Samoa, sa galulue ai le Komisi o le Gagana, mo se 20 ma ona tupu tausaga.

O se tusiupu muamua lea ua saunia i le na o le gagana Samoa i lona atoaga, e ese ai ma isi tusiupu e tapena i gagana e lua— Samoa ma le gagana Peretania.

E pei ona tolaulauina i saunoaga o le afiafi, o le faamoemoe sili i le Komisi, ina faamaopoopo upu o le gagana e faatumu ai le ava sa tuua mai i galuega na muamua. O le tusi lata mai a Milner, ua silia se 50 tausaga talu lona lomiga. Talu mai lena ua iloga ni suiga i le gagana atoa fo'i ma upu fou ua faaofi ae le'i faamauina aloa'ia.

O lenei galuega o le pine vaaia o fe'au ma savali sa femolita'i mai i tausaga ua mavae. Sa faailoa le mana'oga mo se tusi e pei ona taulamua ai nisi o faalapopotoga o le gagana Samoa nei ma fafo atu.

E iai le pasia o le Tulafono o le Komisi o le Gagana i le 2014. Saunoa le Komesina o le Komisi, Rev Vaiao Eteuati, o le Tulafono o le tali a le malo i le tulaga fai ifo o le



E 27 afe le aofa'i o upu ua mafai ona faamauina i le tusi, faamau ma faamatalaina i le gagana Samoa

gagana ma lona faaogaga. Mai le Tulafono e fanau mai ai le tusi faasino'upu lenei, ma isi taulagalaga aoga.

O loo avea pea tusi a Milner ma Pratt fesoasoani mo su'esu'ega ma aoga. E le ta'ua nisi taulagalaga mai sui ta'ito'atasi.

E le pine o se taimi o i luma ona silamio lea le lautele o le atunuu i le 'anotusi. Ae na o se tauilo i mea o i totonu ma lona tapenaina, ae faapea foi se matau a le

'aufaitofa o le gagana, o e sa tapua'i faiva, e le gata i Samoa e lua a o fafo atu.

Sa auai le palemia o Samoa, Fiamē Naomi Mata'afa, sui o le malo ma ekalesia, le Pule Sili o le iunivesite a Aukilani ma lana 'aumalaga i le sauniga, sa faailoa le agaga sapaapai i lenei galuega taua, e tautuaina le gagana.

Sa faailoa fo'i le sao o le Laumua o Mataupu tau Samoa (NUS), ae faapea le faalapopotoga FAGASA, sa lagolagosua i lenei fitaituga iloga.

TALA A'OGA I LOU VAIFANUA:

Taufai malilie a'oga e lua e galulue femalamalama'i

O se tasi o iunivesite matua i Niu Sila, le iunivesite a Aukilani, ma le iunivesite Aoao a Samoa, na taufai malilie e galulue felata'i e ala i se maliega na sainia i le va o a'oga e lua.

O le Aso Faraile na se'i tuana'i na feiloa'i ai ta'ita'i o a'oga e lua mo le faamoemoe. O le 'aumalaga sa ta'ita'i mai e le Pule Sili, le tama'ita'i polofesa ia Dawn Freshwater, faafeao mai e le Faa-ao Sui Polofesa ia Jemaima Tiatia-Siau, ma le susuga i le faia'oga, Lemoa Henry Fesulua'i.

I le itu a Samoa le Pule Sili, Polofesa Tuifuisa'a Patila-Amosa, ma le Sui Pule Sili, Peseta Dr Desmond Lee Hang.

I lenei feiloa'iga na faamautinoa ai le naunautu'iga e fia galulue faatasi, faapitoa i le lagolagoina o su'esu'ega tau Pasefika, poo na e aafia tonu ai malo e lua. O lenei maliega o le a mauafia ai itu e lua i auala e faalelei ai le atina'e o fanau Pasefika poo Samoa foi o loo a'oga i a'oga e lua.

O le tasi o vaega taua i lenei faiga pa'aga, o le vasagaina o mataupu a'oa'o, e mafai ai ona talia fanau ma a latou ausiga pe a malaga atu i Niu Sila, faapea foi mo latou e



Faaao Sui polofesa Jemaima Tiatia Siau, Pulesili Polofesa Dawn Freshwater, Pulesili Tuifuisa'a Patila Amosa, saini maliega

fia malaga mai e a'o'oga i Samoa. E mautinoa o se tasi lea folafolaga logomalie ia i latou sa lei tupu muamua.

O se tasi o laasaga taua mo le iunivesite a le atunuu, i lenei fefaasoa'i ai ma se tasi o iunivesite matua i le Pasefika, e auala lea i atagalua o galuega ma sini e ta'ita'iina ai se iunivesite i le lalolagi tele. O le a maua sea fesoasoani e ala i le maliega ua sainia.

Faata'ita'iga, o ausiga a Aukilani i le

lalolagi e faatauaina ai A'oa'oga Anoa e ofoina atu i tama ma teine a'oga. Mo se iunivesite tauamata, e le tauilo ona itu lelei.

E sosoo le malaga a Aukilani ma le isi foi malaga mai Aukilani na muamua, i nisi o ta'iulu o le iunivesite Aukilani Tekonolosi (AUT). I le agaga lava lea e tasi e fia galulue faatasi. E iai foi isi iunivesite a Niu Sila ua mae'a ona saini ni maliega ma le iunivesite Aoao a Samoa e pei o lenei.

Faaletonu matua i le tulaga o galuega fou fia faia

E tolu ni a'oga e ana matua o loo faaletonu o latou finagalo I le tulaga o galuega tau faalea'oga o loo fia faia.

O nei galuega o loo taofia nei ona o se eseese I le va o le konekarate ma pulega o a'oga, pe faapefea foi, le Malosi'aga Tau Eletise a le Malo.

Na iloa ane e le mafai ona faatino galuega ona e le lavatia e le malosi o le eletise ona faaola le masini siimea (crane) e faatino ai fe'au o nei galuega.

E tusa ma se \$41,000 e mana'omia mo lea suiga I le malosi o le eletise, ma faapea ona to'a ai fuafuaga. O lea vaega tupe e le o iai I totonu o le tau o galuega e pei ona ofoina mai e le malo o Saina.

O lea na tonu ai I matua o le a'oga Apia Primary e saili e I latou le seleni. O loo feagai nei matua ma lea fitaituga i lenei taimi.

Na faaali se finagalo o se tasi o matua e faameo I le lape e manatu ia e afua mai I le Malosiaga o Eletise a le malo. O lona taofi, sa tatau I le faalapotopotoga ona fai e latou, aua o la latou galuega lea.

Peita'i ua manatu e le faatali a'oga a le fanau se'I malilie mai nei pulega, e aafia ai



Asiasiga a le Amepasa a le malo Saina, Fei Mingxing i le a'oga tulagalua i Apia (Primary) na ofoina le tupe e faalelei ai

le konekarate o le a faia le galuega.

E \$30 miliona sa aumai I le malo o Saina e faalelei ai falea'oga o ni a'oga se tolu: Tulagalua a Lepa, Tulagalua a St. Theresa, ma le Tulagalua a Apia. O le sini o galuega o le suia o nei falea'oga e avea ma ni ofaga faaonaponei e lelei ma saogalemu mo fanau.

E ilgoa ni aafiaga o lenei to'a mo vaega uma e aafia. Mo le konekarate mai Saina, ZhengTai Group e faia galuega, e au ina le ausia aso tuupoina e mae'a ai. Sa faamoe-

moe le galuega a Apia Primary e mae'a I le amataga o le tausaga fou.

O le popolega o matua e aga'I tonu I Aafiaga o a'oga a alo ma fanau talu sea lape faalegaluega.

E faapena foi I isi a'oga e lua o loo faatalitali. O le a le taunuu foi le sini o aso tuupoina, ma afaina ai le fanau.

E tusa I le ripoti a le Samoa Observer, e tele isi falea'oga I le atunuu o loo mana'omia vave ni faaleleiga; ma e mana'omia le ta'ita'iga I nuu ma itumalo, ma le malo fo'i.

Faasoa o le Vaiaso: Faatonu OLA

O le tali i le faalogogata o fanau o le lavapapale ma le onosa'i

O le finauga poo le fea le auala aupito aoga e faatonutonu ai le amio a fanau i le a'oga o loo fa'aaauu pea.

E leai se tali e 100 pasene, a maua se 'afa o lena atonu ua tali ai le mana'oga, peita'i e le mana'omia se 'afa tali e moomia se tali atoa.

O soo se mea e faapotopoto ai tagata o iai foi ma le mana'oga. Mo a'oga e sili ona leotele sea mana'oga ona o mafua'aga ua silafia lava. Muamua, o tamaiti mai nuu eseese ma aiga e tofu ma le agaifanua, e faamoemoe faia'oga i le maopoopo o tulafono a le a'oga, ae faapena fo'i se fesoasoani mai matua ma si'osi'omaga o aiga ma nuu.

O le filosofia a Samoa e tausi tele fanau ua iloga lona lu'itauina i nei aso. E pei ona maua i se faasoa se faata'ita'iga, e fue e le faia'oga ae toe alu atu fo'i sasa e le tamā poo le tina.

O le mataupu i le sasa o se tasi fo'i finauga aua e manatu nisi o le sasa e le o se mea a Samoa a o se mea na faaofi mai i taimi o misionare. Ae sa talitonu Samoa i le taua o le faatonu i upu ma tapu'e vave mai le olaga o fanau a o iti, i upu faala'e'iau. Aemaise o le vaogagana fa'aaloalo e tausi ai le va ma o latou ta'ita'i poo e matutua.

Ua lausilafia le upu, E fafaga tama a manu i fuga o laau, ae fafaga tama a tagata i upu. O le tofi lava ia o manu o fuga suamalie (e le leaga) a o le tofi faafailele o matua i fanau o le tapu'e e ala i upu lelei ma suamalie foi, pei ona molimau le Tusi Paia.

Ua tatou so'ona faamamafa le upu 'faatonu' ae o lea upu o loo afifi ai le

malosi'aga o le pule—pule a matua—a fai atu loa fai loa. Pe faapea foi, le pule a le faia'oga e le agaia pe paoina e se tamaitiiti a'oga.

Ae pei ona manino mai i le filosofia Samoa, le upu fafaga, o loo aumai ai ata manino e pei o le tina e faasusu lana pepe; fafaga lona uiga e tapu'e le laau ina ia tupu ma ola malosi i mea lelei. A vave ona tapu'e mai fanau a o iti lava i mea lelei—ae le o le faaviivii vale ma faaoloataua, ona molimauina lea o ni suiga tatou te fiafia uma i ai.

Mai taimi na amata ai a'oga i Samoa, sa mulimulita'i i faiga a o tatou matai papalagi, ae faapea fo'i le faatonu mai a le Tusi Paia e tusa i le faafailelega o fanau.

O ata o a'oga mai fafo sa faamuamua ai le usita'i ma gaua'i atoatoa o fanau i faatonuga mai o latou matai faia'oga. E leai se tali upu, leai se faanoi poo se avanoa e ta'u atu se mea o i le loto. O atagalua lava ia o loo faumalo ia tatou auala e faatonutonu ai fanau. O le fue i le laau le auala e gata ai ma sa talia lava e matua ma i latou uma e faia le faafailelega.

A ua sui le lalolagi, sui le vaai i nei foi tupu-laga i auala e fafoefoe ai le tiute. Ma faapea ona omia ai i totonu nisi o aganuu ma a latou faiga, ma tula'i mai ai ni mataupu faigata.

E pei ona iai le pule a le Tulafono e puipui ai le sauaina o fanau. Ma o le fesili laualuga o loo feagai ma matua Pasefika, atoa fo'i pulega o a'oga, o fea le tua'oi e avanoa ai le tama uluvale e fai lona ulavale. I Niu Sila mo se faata'ita'iga, e sa le pa'i i le tino o se tamaitiiti ma faapea ona le maufetuuna'iina ai le faia'oga.

Tusa pe fai atu sa aapa e taofi mai ne'i afaina isi tamaiti, e fesiligia lava.

Upu moni, ua le toe faigofie le galuega a le faia'oga Samoa i lena talutalufou o suiga i mafaufau ma lagona, ma ua matua moomia ni isi auala fou e toomaga i ai. Ua tau le toe maua fanau sa iai i le 40 tausaga ua mavae, i latou e usiusita'i ma gaua'i.

Ua le toe maua foi matua ia sa iai, e sasa lana tama pe a uma ona sasa e le faia'oga poo le faife'au. Ua fulufulele matua i nei aso pe a pa'ia le tino o le fanau e se isi.

O le a la se fesoasoani mo le 'aufaigaluega faia'oga? E manatu le faasoa e maua lava i le tofa mamao ma le utaga loloto faa-Samoa. I totonu o na mea taua le agaga o le lavapapale ma le onosa'i. Lavapapale e mafai ona faauigaina, o le mafai lea ona taofi le ita ae fa'aaoga le poto e tali atu ai. Fa'aaoga tulafono ma faiga faavae a le a'oga. O lena e amana'ia ai lau ta'ita'iga, ae le o se fa'aaliga o le vaivai. E le 'e'e se ta'ita'i pe taufaamata'u, e pei ona malie i se tasi faasoa a le Samoa Observer.

Peita'i o nei tomai poo uiga foi, e tatau ona a'oa'o ma faamalosi e ala i faafou a a'oga. O le fesili, O le a sau taga e fai pe a le usita'ia sau faatonuga e se tamaitiiti? Pe e tali atu i ai i le taga masani pe i se isi auala e sili atu le malosi ma mata'utia (aoga tele)?



Atonu o se talanoaga lena e le na o A'oga ma le matagaluega e aafia ai, a o Samoa uma, i le taua o le tapu'e o faia'oga i auala fou e faatonutonu ai fanau i nei aso.

Ae tatou te faafetai o loo mafuli le numera o fanau i le tausisia o le ava ma le fa'aaloalo i faia'oga, pe na o sina pasene o fanau e faasalaese, ae o nisi fo'i o i latou e mafua ona faapea ona o faafitauli faaleaiga.

EVALEON BOOKS NIUPAC PUBLISHING

Telefoni 7796213 e-meli: evaleon.books@gmail.com

Tautua e ala i le gaosia o alaga'oa mo a'oga (tusi mo le a'oa'oina o le faitau i le gagana Samoa, tusi e a'oa'o ai gagana, kalena, posters, yearbooks, brochures). E tautua fo'i i le fa'aliliuga o gagana, ma le tapenaina o ni tusi e fia lomina i so'o se sionara o fatuga.



UPU O LE POTO:

O le a'oga o le 'a'upega aupito mata'utia na te suia le lalolagi.

—Nelson Mandela

E matua le mafai ona a'oa'o se tasi ua manatu ifo ua na iloa mea uma
—Epictetus

O le a'oga o le mea e totoe mai ina ua galo uma ia te oe mea sa a'o i le a'oga
- Albert Einstein

Ne'i Mea Ane ua Galo

O ai Tupuivao o loo faatatau i ai le faamau a Kalama?



FAI MAI LE FAAMAU a Kalama na usu Tauilili i Papa ia Taufau Tuiaana Tuiatua ona maua lea o Tupuivao. Na usu Tupuivao ia Iliganoataulaloese o le afafine o Malietoa Taulapapa o Solosolo e iai Luamanuvae. Toe faapea mai Kalama na maliu Tupuivao i le aso 1 o Iulai, 1894.

O le fesili, poo Tupuivao lea le tama a Taufau o le talafaasolo poo se tasi na ia tauave le suafa? O se fesili lea mo le 'ausu'esu'e. Auā a faamaonia o ia moni lea, ona foliga lea e toe fai se faatulagaga o aso o lo tatou tala, e fua i lona taimi. E manatu nisi e i tua o le lotu (Kerisiano) le taimi o Tupuivao. E iai mau e lagolago ai.

Afai e faamaoni le faamau a Kalama, lona uiga na fanau o ia pe a ma le 1820 i le 1825. E iai le pine e faamaonia ai, o le loa pa'epa'e e tu i le lotoa LMS o Logologo i Matautu, Falealili. I le loa e iai upu nei: Na maliu le alii o Tupuivao i le aso 1 Iulai 1894. E mafua ai le isi fesili, Aisea ua faamau ai e Kalama lea mea pe afai na te iloa e le taua i le tala o Samoa? A o se fe'au lea mo le 'au su'esu'e.

O le mau e agaia e faapea mai, sa soifua i totonu o le 16 seneturi, ae pe fia ona tausaga ua leai se tali manino i ai. Ua na o ni taumatega pe a fa'aaoga le fua masani o le 60-70 le aga sa masani ona soifua ai le lalolagi i na taimi.

Ona o Tupuivao o le talatuu o se toa ma se tagata e gaoioi, e pei ona molimau foi lona igoa, e mafai ona tuu i ai le 70, tula'i mai se aso i tua atu o le lotu (LMS 1830). Afai na soifua pe a ma le 1524, lona uiga e taunuu papalagi ua leva ona iai ma soifua o ia. Fai mai molimau o le tala tuufaasolo na faaunuu i Tutuila ina ua malolo i le la finauga ma lona tausoga mo le pule. Pe na maliu i Tutuila ma falelauasi ai e le o manino foi se molimau i ai.



~ IULAI 1-15 ~

2

1909 Tuumalo toe Tui Manu'a
1962 Faatau atu faailogatusi e lua a le malo o Samoa

3

1877 Malilie itutaua e lua e aloa'ia le tuto'atasi o Apia, sooupu Theodore Weber
1932 Faatasiga Mulimuli tagata Siamani tatala maa faamanatu o le iai i Samoa

4

1949 Amata galuega Malumalu Metotisi i Matafele, Apia

1997 Sui igoa o Samoa i Sisifo ia Samoa

5

1963 Tatala le alavaa Faleolo-Rarotonga

6

1973 Tuumalo liga Kuresa, fatupese
2001 Maliu Derek Freeman, alii su'esu'e olaga faa-Samoa

7

1911 Fa'aaoga le igoa Amerika Samoa
2012 Maliu George Milner, tusia le tusi-upu Samoa, Samoan Dictionary

8

1893 Osofa'i 'au a Mata'afa i Vailele e fitafita a le malo, sulufa'i atu i Manono

2000 Lakapi: Malo Samoa ia Italia

9

1983 Tuumalo Tupua Tamasese Lealofi IV
1992 Tuumalo Noue Tamasese Meaole
2018 Fano fanau to'alua, sese tui na fai

10

1928 Faalava'au Lei Mau, ulua'i faasala-ga faapea i Samoa, pulega a Niu Sila
1967 Sui seleni & pauni i le tala ma sene

11

1998 Ulua'i taaloga lakapi tama'ita'i i Samoa, NUS ma le Samoa Polytech

12

1881 Maliega i luga o le vaa Lackawanna vaevae ai tofiga Malietoa ma Tupua
1935 Aso soifua Tuna Scanlan, i Apia

13

1893 Pu'e Mataafa i Savaii e fitafita malo
1915 Tatala ulua'i faleoloa Moles i Apia

14

1964 Tatala ulua'i koneferenisi Metotisi Samoa, peresitene muamua Misi Matoka

15

1952 Taunuu i Samoa Gary Cooper pu'ega o le ata tifaga Return to Paradise
2000 Malo Samoa Ipu taamilosaga Epsom Cup ia Amerika, 12-7



Le toe Tu'i Manu'a (Elisara) na gata ai pulega o lea suafa i Samoa ma le Pasefika

O ai lenei tagata e suafa ia Tupuivao? Tatou te fia iloa uma lava le tali; auā e le tele ni suafa e faagae'eina o tatou faalogona pe a ta'ua. Tamafaiga e iloa i le saua, ae iloga foi molimau i le saua o Tupuivao, ae tu ese mai Tupuivao i lona tagofia o tino o tagata o ni taumafa; e paga tutusa ai ma Lafai Taulupoo ma isi Malietoa.

O ai lenei tagata e saua, toa, 'ai tagata, e le popole i ni tofi, e tuumavaega, o se aloalii e naunau i le faiva o le seulupe, o se e faaaliali lana pule i tagata? (E afio i luga o le Lau Pule e iloa ai lona tulaga

ese mai isi uma). O se fesili lea mo se tusitala su'esu'e i mea tau le mafaufau. Ae peita'i e mautinoa e le o se lu'i faigofie.

Toe foi i le fesili i le vaitau na soifua ai, e le faigofie ona talia le mau a Kalama i le 1894, pe afai e faatatau i le Tupuivao ua tatou iloa.

E iloga fo'i lenei vaimasina i le fa'alo atu i nisi o suafa lausilafia i le atina'e o Samoa e ala i taleni eseese. EW Gurr le alii Niu Sila ma se sui o le Mau; liga Kuresa, faipese na lagia le Vii o le Sa'olotoga; Malietoa Tanumafili 1, fautua i le malo; John Derek Freeman, alii su'esu'e i mataupu tau Samoa; George B Milner, ta'uta'ua i le tuu faatasia o le Tusiupu Samoa (Samoa Dictionary) e aofia ai Samoa e lua. Le tuua o le malo e le Masiofo ia Noue Tamasese.

Ae faapea foi le tuua o le malo e le toe Tui Manu'a; na sainia le tuina atu o Manu'a i le pule a Amerika, i le 1904.

Ae atoa ai foi le 60 tausaga o le faavaeina o se faia tuto'atasi a le Ekalesia Metotisi, ina ua mafai ona faavae lana lava Koneferenisi. O se tasi pine leni o le naunauga o tagata lotu Samoa e pulea e i latou a latou upufai taulelotu. Ma faapea ona faamatuu atu ai faia o pulega a papalagi sa mua'i faafailele tama.

UILI FAU UPU

Saili tali o fesili o lo’o i lalo. Pule oe pe sipela i luma (clockwise) po’o tua (anticlockwise).

E sa le feosoosofa’i.

1. Tusi mai uiga o le upu *ala* i le 1. Samoa 2. Igilisi:

2. Sa’ili ni upu se 5 e faai’u i le fasiupu *la*

3. Su’e se upu e 9 mata’itusi ma tusi sona fa’amatalaga:



4. Tusi uma upu/ fuiupu e ta’i 3-9 mata’itusi, ma o latou soa i le Igilisi (E faitau ai ma upu ta’ua i le 1, 2 & 3)


Lelei atoa = 12 upu

Lelei tele = 8 upu

Lelei = 6 upu

PASO I GAGANA E LUA /2024-6

Faatumu avanoa i upu/igoa Peretania e soa tutusa ma upu Samoa (vaai Ftg.) **Fill crossword with English words/names or equivalents of Samoan**



©LPSL TAVITA

Faalava ~ Across

- 1 tali (6)
- 4 sina (mea itiiti) (1,3)
- 8 Upu ofo (2,2)
- 9 tagata to laau (6)
- 11 tagata faamalolo ma’i (6)
- 12 le isi (4)
- 14 fpp. Igoa Allen (2)
- 15 solo e tutusa lea leo faaiu (6)
- 19 mea sese pe vaivai (4)
- 22 fpp. Mea ta’itasi (2)
- 24 l lalo (5)
- 27 toa (5)
- 28 taimi tuana’i o le ’ai (3)
- 29 ta’itasi uma (5)
- 30 suafa taua (5)

- 2 aotelega (7)
- 3 fpp. Faata’ita’iga (2)
- 5 Tino tagata: totoga i totonu (5)
- 6 tolu (5)
- 7 ita (3)
- 10 faatauva, lamo’i (4)
- 12 ituaiga tagata pupuu (3)
- 13 sami (3)
- 16 moa (3)
- 17 se isi sipela o le igoa May (3)
- 18 Itulagi: fpp. (saute-sasa’e) (1,1)
- 20 aupito itiiti (5)
- 21 o fea? (5)
- 23 faaoso e fai se mes sese (4)
- 24 faaoga (3)
- 25 Tia (manu) fafine (3)
- 26 o le ave o le la susulu (3)

Lalo~Down

- 1 se isi (7)

SUDOKU ~ TAALOGA I NUMERA

(courtesy—sudoku.com)



THE ALPHA BUILDER

Rules:

1. Build as many English words as possible, start with three letter words.
2. Every word you build must include the Alpha Letter (centre).
3. Each letter is used only once, including the Alpha Letter.
4. The class as individuals or groups can play this game. 1 point for one three letter word, 2 for four letter word, 3 for five, and so forth.



Three letter words

Four letter words

Five letter words


Six –seven letter words

ADDITIONAL ACTIVITY: Make a list of other words that are spelt without the Alpha Letter E.g. LOG, FLOW

TAALOGA E LAGOLAGO AI LE LITERASI A FANAU A'OGA I LE GAGANA ATOA LE POTO SALALAU

~ TAALOGA PASO SAMOA I LE GAGANA SAMOA ~ POTO LAUTELE ~

1. Faatumu le pusa i upu/igoa Samoa poo se tasi e faatonuina.
2. **Faailoga tupe \$100 poo tusi faitau a'oga** mo sē e mua'i faatumua le paso i lona sa'o atoatoa (Tuutuuga: ia tuuina mai lau tali i totonu o le vaiaso mai le aso o le lomiga).
3. E leai se tasi na maua le faatulagaga sa'o o le paso lomiga 6 2024. E fa'aauau le taaloga se'ia maua le malo.



Copyright LPSL Tavita 2024

FAALAVA ~ ACROSS

1. Taula'i le va'ai poo le faalogo (6)
4. Upu o lauga: Ua lupepe le _____ (10)
10. Laumua ekalesia EFKS (5)
14. Ta'u masani o se mea e tupu e pei o maliu mmf (11)
15. tala o se nuu poo se aiga poo se malo foi (11)
16. O le a e pala ae le pala upu? (3)
17. Gafa e tupuga mai ai lesu le Nasareta (4,1,6)
18. fuataga tutusa (6)
19. pa'ia i le lima se mea (4)
20. e manava ai (3)
23. faimalaga (se isi upu tutusa) (7)
28. tafao (se isi upu tutusa) (3)
30. e faata'ita'i i ai se fe'au (6)
32. Tusi faitau: le tama i le tusi a Apelu Aiavao (7)
33. se pua'a peti (2)

34. saofa'iga pito i luma (8)
38. Numera e igoa ai se nuu i Salafai (3)
39. e faamatagofie ai (3)
40. se aufaipese mai Letogo a'e mai i le vaitausaga 70 ma le 80 (6)
43. Taimi: taunuu i le itula (2)
44. Suafa matai faipule Fono Faitulafono Faleata Numera 4 (3)



46. se afioaga i Safata (9)
47. Aso fanau ta'uta'ua: Aso soifua o le Ao o le Malo talu ai: Malietoa Tanumafili le

- Lua: Ianuari __, 1913 (2)
 48. taofi se tagata a o tautala (3)
 49. tuu atu i le mana'o o se tasi poo oe foi (5)
 52. Upu o lauga: Mapu ia i le __ (3)
 54. Se isi suafa o Maria: lotu Katoliko (9)
 59. Upu tuai: mafatia le lagona le maua ai se to'a (8)
 60. igoa o se manu o le gataifale (4)
 61. Tusi Paia: nuu o Aperaamo (3)
 63. tafitvale ona o se ma'i (3)
 64. Salamo 23: E leai se mea ou te __ ai (6)
 65. igoa o se vaituloto i Lotofaga (5)
 70. O se faamoemoe ua taupule i se aso lumana'i (5)
 71. taumate (se isi upu) (6)
 72. leoleoga o se tamalii tuumalo (10)
 77. alu a'e i luga le afi (5)
 79. Avatu ni lo aumai ni __ (2)
 80. Gagana: fasi upu e iai se veape poo se nauna (6)
 81. Agana: E __ (2,4)
 82. Ufi: e fua i ai le matua (6)
 83. o se meataulima Samoa (4)
 86. Gasolo le pasese i luga o le pasi poo le vaalele foi (5)
 87. se isi igoa o le malae o Ti'afau: __ a Samoa (5,1, 12)
 89. Upu sa'o: Sa'o/ Sese o le aiga sa Pi'o (3)
 90. Tusi Paia: Tau lava o sina __ e avane (6)
 91. o le e faafoea le fono faitulafono a Samoa (6,7)
- ### LALO ~ DOWN
1. Upu faaaloalo foliga (6)
 2. malilie faatasi (7)
 3. o se fa'aaloalo e sii ai se aiga poo se nuu (7)
 5. Faia a lesu ma le Atua le Tama (6)
 6. Fuaiupu: "Ou te __ i le tatou aiga." (3,3)
 7. Tusi Paia (Numera 3.2): Le atalii matua o Arona le ositaulaga (6)
 8. Sa faifeau i Lotofaga EFKS (7)

PASO SAMOA TAALOGA MAUA LE TAU TUPE \$150


- 9. Savali ma 'ai se mea'ai (6)
- 10. Malo pei se ma'a (4)
- 11. leoleo o se fale i le po (8)
- 12. Lotu: Aso na maliu ai le Faaola (3,7)
- 13. Komesina Maualuga Samoa i Ausetalia (6)
- 21. se alalafaga i Salafai (5)
- 22. se suafa taua faalupega Leauvaa (9)
- 24. Igoa o se laau malo (3)
- 25. Nuti lili i le alava (3)
- 26. leai se mea (3)
- 27. igoa o se toga ta'uta'ua i talatuu a Samoa (4)
- 28. Upu: Aua le _ le va." (4)
- 29. Lotu: "Tatou _ i le tatalo." (5)
- 31. Laumua o Eleni (6)
- 35. laulaututu lauulu o le ulu (5)
- 36. Talafaasolo: Suafa matai o le masiofo Fetauimalemau sa faipule (5)



- 37. faamatala ai se matai e faamoemoe i ai tonu fai o se nuu: _ le tofa (5)
- 40. igoa o se nuu i Salafai (4)
- 41. suavai, ta'u masani (3)
- 42. Fusuaga: faatau atu se mana'o e fia tauva ma se siamupini (3)

- 45. lapotopoto (3)
- 47. faailoaga o le fa'aaloalo (5)
- 50. i se auala e le aloa'ia (6)
- 51. igoa o se 'ulu (4)
- 52. Fuiupu: Suiga o le _ (3)
- 53. e faamata (3)
- 55. Tifaga: se ata katuni e iai le teine o Moana ma le aitu o Maui (5)
- 56. e tatala ai le sefe (2)
- 57. o se tasi matai Malie i le toafitu o le fale Malietoa (5)
- 58. Talatuu Samoa: tuagane o le teine o Tapuitea (5)
- 60. e usu faatatau i ai le pese (4)
- 62. se aufaipese lauiloa vaitausaga 70 ma le 80 mai Aana (4,6)
- 65. Pese: tuai le usuga o se vaega (4)
- 66. Muagagana: _ le fafao (5)
- 67. Togia se aso mo se faamoemoe (5)
- 68. Muagagana: Ua _ le vaa o mala (7)
- 69. Kalama: se sooupu taatele (2)
- 72. fale mo gasegase (7)
- 73. 'a'iu, limavale (7)
- 74. upu tuai: vaivai (7)
- 75. leo o se taavale aga'i mai (2)
- 76. se suafa matai (7)
- 78. faiupu e faailoa ai le tete'e (6)
- 79. filogia (se isi upu) (6)
- 83. mea ua tuua pe a uma se faasoa (5)
- 84. maua e le pogisa se malaga (5)
- 85. Pese Kerisimasi: _ atu ia faalogo i agelu (3)
- 88. pogai (se isi upu) (2)

TALI PASO SAMOA LOMIGA 5 2024



TALI PASO 5—LUA GAGANA



©LPSL Tavita 2024



SOLO

NM Taiotumua & OLA

Filifiliga

Filifiliga a le tagata luagia i ona vaivaiga; mafua ai ona lolo i le faaososoga a le fili: 'Tago i ai e suamalie fafao i le 'ato e leai se isi o tilotilo mai; mulimuli ane e oona i le manava—'

Le manogi o le tupe maua i mea fa'aalatua; le ta'isi ma le moa; le masani ua pa'u a'i; ae faigata foi lenei mea o le alofa.

Filifiliga a le tagata luagia i le mata'u i le Atua, mafua ai ona lolo i le musumusuga a le lotofuatiaifo lelei; ati i le loto pei o ave maama'ai o le la i le fanua; Pua'iina le nanamu o le faimeatonu, le ola e ala i se faata'ita'iga lelei; le malosi'aga fou e suia le vaivai—the valea—ua loa le pa'u a'i; e le toe faanoi ai i le mativa.

Filifiliga a le tagata luagia i ona vaivaiga; lamatia ai e faaososoga; pologa ai i le leaga; se'ia faasa'olotoina e le poto mai le Atua— e filifili tonu ai.



FAASOA FAAPITOA: DR GEORGE TURNER, LILIUINA I LE GAGANA SAMOA E SEMISI MA'IA'I

Samoa anamua ma ana faafiafiaga: i le molimau a Misi Tana misionare LMS sa galue i Samoa



I lalo o le ulutala o FAAFIIFIAGA o le a maua ai ia mea e i ai ia siva, piiga, fusuaga, 'ailao ma isi lava mau taaloga. O ia mea e tatau ona faamatala ma'oti ma o mea ia o le a tatou liliu i ai mo le taimi nei.

SIVA

O se mea taatele leni i faiga'ai e i ai faipoipoga. O nisi a latou siva e faia i le aoatea, a e o nisi, e osia i le po. E pei lava o siva faipo i isi atunuu e aloa'ia nei poula ma le faalialia

tele o la'ei faaleatunuu, 'ietoga ma isi lava mea faapena. E lavalava tane ia latou malo i popese ma pofiafia. Sa na o tane e sisiva i nisi fiafia, a e o nisi fiafia foi sa na o tama'ita'i e sausaunoa.

E seasea lava ona sisiva faatasi ia ituaiga e lua. E sisiva i soa ta'ilua, ta'itolu, pe o le sili atu e faafesaga'i. Afai e siva le isi aga'i i matau ona siva ai lea o le tasi aga'i i ama. E i ai foi ia taga ma felafoa'iga o lima e a'oina lelei ma pa'utonu. E tutusa lava ia gaoioiga a le ausiva atoa: a sii le lima o le tasi e faapena fo'i ona sii o lima o le ausiva uma.

O le siva atoa e faatulaga lelei ma ua le soona fegaoioia'i ia tagata sisiva. E avea ia pesega ma le pati o lima faatasi ma le ta o le fala ma talipalau ma mea e faafeaoina ia faafiafiaga faamusika. O le fati o a latou lagisolo e seasea ona sili atu i lo le lua pe tolu ia ni nota, a e ua taotasi lava i leo logo tasi faapea.

E fefo'ifo'ia'i i ni nai laina se lua pe tolu. E naunau i latou i fesuia'iga i le taimi o a latou pese ma musika. Latou te amata lemu ma faimalie ona faatelevave lea le pese i le i'uga o le luasefulu minute; i lea taimi e matua laga'i i latou, o le afu ua tafelele, a o laulaufaiva e galulue faavave pei o tautuuga solofanua ua taumomole i le sesela.

O pātē e tusa e tolu ia ituaiga sa faaoga. O le LALI; pe tusa o le ono i le valu ia futu ia le umi ma e vanea i le ogatotonu e faatatau i le umi o le ogalaau e mana'omia; e ta le itu lea i se 'auta. A o se tasi ituaiga pate e faia i ni pupu 'ofe pe atoa le fa futu ia le uumi, e saisai i se taga e lalaga i se fala o latou pito lalo. O le taga e ta i se 'auta.

O lona tolu o pate e ta lea e ni tagata se to'afa pe to'alima, e tofu ma le ofe e tatala le itu i luga a e pupuni le itu i lalo. E 'umia le ofe faatusa'o i luga ona fetu'i ai lea i lalo i le eleele po o se maa po o se isi mea malo. E le tutusa ia le uumi o nei ofe ma o le mea



TAULAFOGA: Se tasi o ta'aloga sa fiafia Samoa e ta'a'alo ai, aemaise alii

lea e eseese ai foi ia leo e luai mai pe a fetu'ia i latou i lalo.

Sa iloa ia le mau tu faamataaitu i nei poula: i mea e vaaia, i le gagana faapea foi ma le gaoioiga e faaalua i nei fiafiaga. Sa sisiva ma faafiafia ai seia oo i le ao; e faia soo lava nei mea e i latou.

FAAALUMA

E faasaei ia faaaluma i siva ma isi lava faiga'ai, a e le gata i lea, e faapena foi i fonu. A i ai se alii i se tasi o nei faatasiga, faauta o le a i ai lava ni faaaluma pe to'alua pe to'atolu i lana 'aumaga, o i latou ia latou te fai mea taufaa'ata i le aofia ona o o latou ofu, le savali, po o a latou tausuaga.

FUSUAGA MA TAUGA LAUU

Sa taatele naunau ia mea i aso faailogaina ma faiga'ai; sa avea nei taaloga ma faatupu misa tele. Sa latou fa'aaoga ia ulu lapalapa e sui ai le uatogi ia latou taugalaau. Sa ulufale atu tane faapea foi ma fafine ma le naunau o le tagata faipele e masani i le maea!

FAGATUAGA

O se tasi foi lea taaloga e faia i aso fiafia. E tofitofi 'au i nisi aso ta'ito'afa i le itu; o le 'au e tele a latou tagata e faapa'u'u i lalo o le 'au lea e malo. Ona aumai ai lea e le 'au e faia'ina i le 'au e malo o le faa'ai o se puua vela ma talo. O nei taaloga uma e faia a latou faa'ai i mea'ai.

PIIMAU MA LE TAUTATALA

O se tasi lea ituaiga fagatuaga. E fusi e le tagata muamua le manava o lona lua, e faapea ona faia e ia i lona tolu; ona sau ai lea o le isi tagata e taumafai e tatala eseese ia latou ia. A mafai e le tagata lea ona talai i latou, o ia ua manumalo, ma o le a ave ma ia le faa'ai; a e a le mafai ona malo lea o le au fepiita'i.

O TAGA TI'A

Sa matua taatele foi lea taaloga. E potopoto le tupulaga o se tasi ituala po o se

tasi nuu ma fili sa latou 'au e fetau ma le isi ituala po o se tasi nuu; e faailoga le tuaoi e oo i ai ia tagati'a. E ta ti'a faapea: e muamua ona velo le laau ma na taia le eleele ona mapuga ai lea i luga i le vanimonimo, e lele atu aga'i i le mea sa faatatau e avea ma tini. E tata muamua le tasi 'au; ona taumafai lea le isi e ausia ai la latou matati'a. O le matati'a e pito mamao o le 'au lea e malo.

A o veloveloga pito sagatonu sa faaoga ai a'a niu e faatutu i luga a e tau'ai i ai i lona aano malū ma le vaivai. E velo le 'au muamua ma latou faatutu ai le oganiu ia latou tao laau ona velo ai lea o le 'au lona lua. E taumafai le 'au lea e tulei ese ia tao o le 'au muamua. E faitau tao o totoe i luga o le oganiu pe a uma ia taaloga ta'itasi ma faaputu ai se'ia oo i le tapulaa; o le 'au e mua i le tapulaa o le 'au lea e malo.

I se tasi foi o ia faafiafiaga e tu ai se isi tagata ma lana tao a e tavelo i ai ia tao e le tasi. E faatatau i le ta poto a le o lo o tu, lona saogalemu mai tao o lo o velosia ai ia.

TAU FAGOGOTAGA

Sa malos tele lea mea o le tauva po o ai e tele ana i'a e maua i faiva. O le tautai mau i'a o ia lea na te maua faa'ai o le puua vela ma talo. SEUGA LUPE

O se tasi leni faiva sa masani alii ona 'au ai. E pa'ū le tailupe i le masina o luni. O aso foi ia o faiga'ai tetele; e faaalu uma ia mea i tua'olo a le nuu i sauniuniga o ia aso; ona alusopo ai lea o i latou ma tauamoga o taumafa aga'i i malae o seugalupe i le vao. O iina e to ai o latou faleoo ma mau ai mo ni aso se tele a o aga atu i le taaloga o le seugalupe. A uma ona faamamā le fanua ona tutū ai lea o alii o latou tulaga i se li'o tele. E lafi le tagata lava ia i lala o laau e latalata ane i ai.

Sa i ai se upega e faapipii i se ofe umi; sa i ai foi se lupe faafagafao e tu i se laau e umia e se alii. O lea lupe e fai ma faalata i lupe vao. E faalele e le alii lana lupe; a e o lo o nonoa i lona vae ia se manoa pe tai atoa le tolusefulu futu lona umi ma e taofia le pito fua e le alii. A oo i le taimi e faalele ai ia lupe a alii ona avea lea o le mea atoa o se foaga lupe e peisea'i na taaina mai e le vai po o ni mea'ai.

E le pine a e tosina mai i ai lupevao; a o felele mai i latou i lea mea e vave ona faafelavei e tautai mata popoto. O le e tele ana lupe e seu o ia lea e avea ma tautai sili o le aso; e faaoo atu ia te ia faamalo a ana uo faatasi ma taumafa na saunia. A o ia, na te faataumafa ana uo na le matua faamanuiaina i taumafa. E tunua nisi lupe, a o isi e tufatufa atu i le au seu ina ia faafagafao ma a'o mo le faiva.

Liliu mai le tusi, Samoa: A hundred years ago and long before

TALA MO TAMAITI: VASEGA LAITI

O le igoa o le pepe

E le i leva na taunuu i le fale mai i le falema'i lo'u tina ma la matou pepe fou. O nei e atoa ai le tolu o ona aso, ae e le i iai sona igoa.

"Manaia si igoa lea o Charlotte," o la'u oso atu lea.

"O le matou tusi lena la e faitau i le d'oga," o le Charlotte's Web. Fa'aigoa la'ia ia Charlotte."

"Soia!" fai mai ai Junior. "O Charlotte o le apogaleveleve, e le igoa si o'u tei i se apogaleveleve!"

"Ae a pe a fa'aigoa ia Rose?" o le oso mai lena a lo'u uso matua o Sieni, "pei o Rose la e sau i le Titanic."

Ua taliē o'u tuagane. "E seu lena igoa," na tali mai ai le isi alii ma fai mai ona foliga malie. "Fa'aigoa ia Xena!"

Ua lulu le ulu o lo'u tina. "Ae a pe a fa'aigoa i lou tina Mum, o Taimane?" na fesili mai ai le isi o'u uso.

"E manaia le igoa lena e fai ma ona igoa lona lua," na tali mai ai lo'u tina, "ae ou te mana'o i se igoa mai le Tusi Paia e fai ma ona igoa muamua."

"E sa'o oe, ae fa'a-Samoa," o le tala mai lea a lo'u tamā. E fiafia ai nei ou matua, aua o lea toetiiti taunuu mai!"

Ua alu Sieni e su'e mai le Tusi Paia, a o matou ua tau mafaufau po o a ni igoa Samoa mai le Tusi Paia.

"Ruta," fai mai ai le isi o'u uso.

"Sara," na oso mai ai le isi. "Leai," o le tala lea a Tavita. "E le pei o Sara foliga o le teine. Ae a Elisapeta?"

"La ua iai le Elisapeta i lo tatou aiga," o la'u oso atu lea. "Manaia Maria!"

"Ou te fiafia fo'i i le igoa o Maria," o le tala lea a lo'u tamā. O le igoa lena o le tina o lo'u tina."

"O a'u ou te palota ia Elisapeta, fai mai ai si o'u tuagane laitiiti.

"Leai, fa'aigoa ia Eseta," o le oso mai lea a le isi o'u tuagane. Na ou oso i luga ma ou faataio, 'Maria! Maria! Maria! Maria!' Ua tagi le pepe i lo matou pisa.

"Shh! Soia le pisa tele!" o le tala lea a lo'u tina. "Lea ua iloa le igoa e faaigoa ai le tatou pepe."

Ua filemu uma tagata ma faatali po o le a le igoa o le a ta'u mai.

"Filemu!" ua toe faauma mai le tala a lo'u tina. "Oute mana'o e faaigoa pepe ia Filemu. O le igoa Samoa, ae maua fo'i

i le Tusi Paia."

Ua 'ata lo'u tamā ma fai mai, "Manaia le igoa lena. E to'aiva la'u fanau, e fetau le igoa Filemu i le ui'i." Ua tatagi mai le logo o le faitoto'a.

"O le toea'ina ma le loomatua la ua o mai" fai mai ai lo'u tamā.

Ua ou alu e tatala le faitoto'a. Ua savali mai Papa, ona faalagolago lea o lona to'oto'o i le faitoto'a ae pipii mai ia a'u. Ua ma savavali atu i le potu malolo o iai uma lo matou aiga. A o Mama,

e faatalofa mai a ma faasasa'o i le pepe.

"Fea si a'u tama, fea si a'u tama?" o le pese lea a Mama. Ina ua si'i mai pepe, sa fai mai Papa, e so'o i lona tuafafine. "Leai, e so'o ia a'u," o le oso mai lea a Mama ma tago atu si'i mai.

Ua ou iloa atu loimata o tafe ifo i 'alafau o Mama, a o tilotilo atu ma le fiafia lo'u tina i nai ona matua.

Ua fesili Mama i lo'u tina, "O a mai oe Solo? Ua fai sau mea'ai? Na ma o mai ma le faalifu talo ma le supo moa la e i le ta'avale."

Ua liliu atu i lo'u tamā. "Viliamu, alu atu faamolemole i le ta'avale e aumai mea 'ai la e iai." Ua alu lo'u tamā i le ta'avale, ae ou oso atu faamatala ia Papa ma Mama le tau su'ega o se igoa o le pepe.

Na filemu Papa ma Mama mo sina taimi, a o lo'u tina ua na o le punou i lalo. Te'i a ua filemu uma atu ai ma lo matou fale. Ua fo'i mai lo'u tamā mai le ta'avale ma tilotilo mai ia matou. Tasi lava lana mate i le mea lea ua tupu.

"Oi, Papa, Mama, na matou talatalanoa i se igoa mo le tatou pepe. O le igoa la lea ua maua, o Filemu Taimane. Ae a iai se igoa o lua mafaufau i ai, e lelei fo'i." Ua fusi mau e Mama le pepe ma kisi atu i lona 'alafau. Ua toe maligi ifo ona loimata.

O Papa ua tilotilo i fafo, ona toe tilotilo mai lea ia matou. "Viliamu ma Solo, ua ma fiafia tele na iai tamaiti i le fa'aigoaina o le pepe. O aso la i Samoa a



o matou laiti, e le i iai ni tamaiti pe a faaigoa ni pepe. E maua a le igoa o le pepe e le i fanau mai. A le ni igoa o ni tagata matutua o le aiga, o ni igoa o ni mea taua na tutupu, po'o ni igoa fo'i o ni nofoaga taua. E iai lo'u tuafafine e igoa i le nuu sa matou nonofo ai i Samoa."

Ua va'ai Papa i le pepe, ona va'ai lea ia Mama. "Ua manaia tele igoa na mo le pepe. O Filemu e aumai i le Tusi Paia, a o le igoa Taimane ou te fiafia lava a'u i ai. O le mea lena na ou fia nofo ai i si lo'omatua nei, o le manaia o lona igoa."

Ua faasesepa mata o Mama ia Papa, ma ona mata ua mumu, e pei ua ma i tala ula a Papa.

"Ia, ua uma sia mea," o le oso mai lea a lo'u tamā. "O le igoa o le pepe o Filemu Taimane!"

Ua matou taufai autilo uma ia Filemu a o moe gapepe i vae o Mama.

O le taimi muamua fo'i lea ua ou va'ai atu ai i ona foliga, e so'o uma lava ia Mama.

O LE TALA: Na tusia e Jane Davitt Vaafusuaga. Faaliliu mai le faa-Peretania e Tui To'ailoa. O le ata na tusi e Sarah Anderson. Na toe lomina e le Learning Media Alaga'oa o le Atamai, Folauga 12, 2008.

Ua puipua aia tatau o le tala, lona faaliliuga ma le ata, i lalo o tulafono puleiata, ma e le tatau ona fa'aaoga sese e nisi. ©Jane Davitt Vaafusuaga

O LE SOLO: Na tusia e Saili Aukuso. Ulua'i lomina e le Evaleon Books. ©Evaleon Books



PASI ATU LA TATOU PULETINI I LE TOU A'OGA, AIGA, LOU TUAOI, AU UO, E AOGĀ MO LE FANAU A'OGA



Igoa: Carl Jung

Aso Fanau: 26 Iulai 1875

Ausiga: I lona tulaga o se foma'i su'esu'e i le natura o tagata ma ma'i taulemafaufau

Fetu: Leo

Mo i latou e silafia le suafa, e le tau faamatalaina lona sao i le faiva o su'esu'ega i ma'i o le fai'ai (mafaufau). Ae le gata ai i lona, auā o ona taofi ma mafaufauga ua faatamaoigaina ai isi faiva e iai le faafoma'i, su'esu'ega i aga a le mafaufau, le amio, e o'o lava i le lotu ma le sootaga o tagata i tu faataulaitu. I le mataupu i le mafaufau ma lona atina'e (DPs), e iloa Jung (yung) i ana konesep; e iai lona aupito lauiloa, e faamatala ai ituaiga e lua o tagata. I latou e ola i totonu o latou mafaufau, ma isi e taula'i i fafo la latou vaai. O i latou e vaai i fafo e maua lo latou malosi ma le faaoloaga i galuega ma mafutaga ma isi. O na e ola i totonu e saili malosi i manatu ma taofi taulemafaufau na o latou. O le tasi e fiafia i le mafuta soo, o le isi e taua le 'anoa o se mafutaga. O le tasi e tilotilo i le umi ma le lautele, o le isi i le loloto. E ui i lona, e taofi Jung e itugalua le tagata; e na te mafai ona atina'e faatasi, o le sini ia 'aua ona tele i totonu ae galo fafo; pe tele foi fafo ae lafoa'i totonu. I le mau a Jung, e fa galuega taulemafaufau na te mamate sulu o le tino: faalogona (sensation): lagona (feeling), mafaufau (thinking), sulu o le mau (intuition). O le tasi vaega taua o ana su'esu'ega o lona i le itu o le mafaufau e le o'o iai se malamalama (subconscious); ae mautinoa le sootaga o lona itu ma le vao mea lilo e aliali mai e ala i miti ma faali'a. Peisea'i e iai se sootaga o le mau a Jung ma a tatou talitonuga i le moe ma le tofa.

ATI A'E UPU:

- upuia (v) fai ni upu poo ni tala e faasaga i se tagata poo se mea e fai. Ft., Se'i fai au mea faalenuu ma le upuia so'o o oe. upu'ese (v) fai ni upu ma le faamoemoe e faasese ai le mea moni; ave ni upu sese i se tasi e faatatau i se isi. upusi'i (n) o se fuitau o upu e si'i mai i se tasi.

Tulimanu o Pola:



E mua pea la'u faafetai i le Tamā i le lagi, i lou soifua ma so'u malosi ua tatou toe fesilafa'i ai i lenei taeao fou. Malo le soifua maua. Ae alo maia, o nai motuga'afa fo'i nei a Pola e faanofogofie ai le faafofoga.

O a ma talanoaga ma se tasi o atalii laitiiti e a'oga i se tulagalua i le Tuamasaga, ou te iloa ai le tele o mea o loo tutupu i Samoa. E amata faapea lana talanoa, 'E te iloa oe Na malo le Manu ia Italia? Na misa le faipule foi lele ulupoo ma le fofoga fetalai? E sau le malaga a le tupu foi lele o Kamila i Samoa? E te iloa ua tufa uili paelo o le miliona a le malo? Ou te ofo lava i le pu'e a lenei atalii, ma ou iloa ai foi e iai tamaiti e faalogologo lelei i ripoti o TV ma leitio ma taofi mau faamatalaga. Ia, ou te le vavalo, ae ua ou iloa atu se lumana'i o lenei atalii i le tofi faipule o le matou itumalo. Pau le mea na ou faasa'oina, e le o Kamila le suafa o le tupu, o le masifo lona a le tupu.

Ua ese foi le agi a le savili i lenei vaitau, o le uiga o la'u tala o le savili mai saute mamao-Aotearoa. I le fetuleni mai o a'oga tapulaa tolu e fia mafuta ma si tatou iunivesite iinei. Ae e iai iunivesite i Europa o loo fai pa'aga foi ma Samoa, o le tasi na ofoina mai le faiga o nisi a tatou falea'oga tetele. Ia, talosia o le a ofo mai Aukilani e faalelei nisi vaega o si tatou a'oga. O mea tino mai e iloa ai le moni o le alofa. O le fesili pe talia tusipasi a Samoa i Niu Sila ua leva le tatau ona tupu, pei lava o sitiseni ia e vevesi ai, ua leva lava le tatau ona faasitiseni uma Samoa pe 'ana fai le mea amiotonu.

O a'u le tasi sitiseni Samoa na lagona le loto faafetai i le fitaituga o le Komisi o le Gagana, afioga a le Komesina ma le mamalu o le komisi. E 20 tausaga o tapena mai le galuega, a o lea ua tino mai, malo le tauata'i. Ia, na o le ata o le tasi lea ua ou vaai i ai, ae o le upu muamua lava ou te su'eina pe a maua sa'u kopi, o le ota (ota i'a). Maimau pe 'ana faamumu e iloa gofie ai. Ma faasa'o ai le sipela o le togiga, ua 60 tausaga o le tuto'atasi a o loo sese pea ia toniga. Ae e malosi le taofi ua sa'o uma le sipela o le 27 afe upu o i totonu. Pau lea, pe iai se fofa a le komisi e faalelei ai le 'o'ona o le oka i'a lea ua tumu ai fale'aiga i Apia?

Talanoa pea i le sipela, e o faatasi le sipela tonu ma le leo Samoa. Aua o le tautala lelei o le tatou leo moni lona. O le tautala leaga e le iloa poo fea na sau ai, masalo na sau mai Seoli. A o lea ua faumalo ia tatou leo auliuli. Pei a na o mai faatasi ma mea faakolone. A tautatala Toga ma Maori e tasi a le leo, a o Samoa a talanoa i fafo e fa'aaoga le K ae a ulufale e fai le lotu ua liliu i le T. O la'u faafetai lea, i le lotu ma le palemene ma galuega a le malo o loo taofiofia pea le leo Samoa.

Ae fou la'u faalogo i le fa'aaogaga o le leo K i nisi o sauniga faalelotu ma faalemalo foi. A sui la le leo Atua i le Akua ua sui ai ma le pa'ia o le suafa pei ona sau ai i o tatou tua'a na faua le gagana. O sina tuualalo a Pola, ia tausolomua pea o tatou ta'ita'i e fa'aaoga le tautala lelei. Tuu pea le K i fafo ae a ulufale i totonu, tatou talanoa i le gagana lelei na tofia faapitoa e le Atua mo tatou. Manuia.